

Uztailaren 29an  
**URTEAN ZEHARREKO 17. IGANDEA**

**Agurra**

Jauna zuekin!

**Sarrerako oharpena**

Jesusen bila ibiltzen zen Bere garaiko jendea: ikusteko gogoz, entzuteko irrikaz, ematen zien ogiaren gosez. Gu ere hala bildu al gara gaur? Bera hemen da gure erdian gu asetzeko, gu baketzeko, gu sendotzeko.

**Damu-otoitza**

Senideok: bekatuak alden du egiten gaitu Jaungoikoagandik eta geure senideengandik. Bakeak egin ditzagun, damaturik bekatuen barkamena eskatuz.

—Jesus Jauna, Maria Birjinagandik jaio eta gure senide egina: erruki, Jauna.

—Jesus Jauna, gure ahuleria ezagutzen duzuna: Kristo, erruki.

—Jesus Jauna, familia bakar batean elkartzen gaituzuna: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizitzara

**Otoitza**

**Jainko Jauna, Zugan uste on dutenen zaintzailea,  
Zu gabe ez da ezer sendorik, ez ezer santurik;  
erakutsiezaguzu zeure erruki ugaria;  
Zu gidari eta erakusle zaitugula,  
lurreko ondasunak erabil ditzagun zerukoak iristeko eran.**

**Zure Seme Jesu Kristo gure Jaunaren bitartez,  
Zurekin eta Espiritu Santuarekin batean  
Jainko eta Errege bizi baita gizaldi eta gizaldietan.**

### Hitzaren liturgiari oharpena

Emateak poz handiagoa omen dakar jasotzeak baino, benetan eta eskuzabaltasunez ematen denean. Estilo horretan hezi nahi gaitu Jaunak bere Hitzaren bidez. Entzun, dezagun eta barnera dezagun mezu hori, gero gure ekintzetan agertzeko.

### Lehenengo irakurgaia (2 Erg 4, 42-44)

Erregeen liburutik

Egun haietan, gizon bat etorri zen Baal-Salisatik; lehen fruituekin hogeitigaragar-opil ekarri zizkion Jaungoikoaren gizonari, eta gari berria. Eliseok honela esan zion: «Eman jendeari, jan dezaten». Baina morroiak erantzun: «Zer da hau, ordea, ehun gizonentzat».

Baina hark berriro: «Eman jendeari, jan dezaten; Jaunak honela baitio: "Jango dute, eta hondarrak geldituko dira oraindik"». Eman zien eta jan zuten; eta hondarrak gelditu ziren, Jaunak esan bezala.

### Erantzun-salmoa (Sal 24, 4-5. 6 eta 7cd. 8-9)





Jauna, zure lan guztiek ospa zaitzate,  
 zure zintzoek bedeinka zaitzate.  
 Zure erregetza zein bikain den aitor bezate,  
 zure ahal izateaz hitz egin bezate. R/.

Guztien begiak daude Zuri begira,  
 Zuk ematen diezu beren garaian janaria.  
 Zabaltzen duzu zeure esku hori,  
 pozik ematen ase**a** bizidun denei. R/.

Zuzena da Jauna bere bide guztietan,  
 zintzoa bere lan guztietan.  
 Bertan dago Jauna deitzen dutenengandik,  
 zintzoki deitzen duten guztiengandik. R/.

### **Bigarren irakurgaia** (Ef 4, 1-6)

San Paulo Apostoluak Efesoarrei

Senideok: Nik, Jaunarengatik bahitua nagoen honek, eskatzen dizuet, zabiltzatela egin zaizuen deiari dagokienez. Izan beti apal, maitagarri, bihotz handiko; eraman elkar maitekiro; saia zaitzte Espirituaren batasunari eusten, bakearen lokarri.

Bat bakarra da gorputza, bat bakarra Espiritua; bat bakarra den bezala zuek izan duzuen deiaren itxaropena ere. Bat bakarra Jauna, bat sinesmena, bat Bataioa; bat bakarra Jaungoikoa, guztion Aita, gauza guztien gaintetik dagoena, guztien barruan eta guztiengan.

### **Aleluia** (Lk 7, 16)



A - le - lu-ia, a le - lu-ia, - a - le - lu- - - -ia. -



Profeta handi bat agertu da gure artean.  
Jaungoikoak ikustaldi egin dio bere herriari. R/.

## Ebanjelioa (Jn 6, 1-15)

### Homiliarako argibideak

#### *Eman zuek jaten*

Jesus errukitu egiten da jendeaz eta ordu garai hartan izan zezaketen goseaz. Horregatik Jainkoagandik datorren Hitza hots egiteaz gain, ogi materiala ere ugaritzen du haientzat. Eta ikasbide gertatzen da orduko eta betiko ikasleentzat.

Ez al die Elizak jaten eman behartsuei eta baztertuei bi mila urteotan zehar? Ez al da ba arduratu gaixoez? Nork asmatu du ba ebanjelizatzea eta laguntza uztartzen, berez Estatuiek eman behar lituzketen laguntzak sarritan emanez?

Gaur ere gosea da munduko arazorik larrienetakoa, eta areagotuz doan arazoa, gainera. Zenbat milioika pertsona, haurrak bereziki, hiltzen dira gosea dela eta? Horren ondoan Elizak profetikoki altxatzen du ahotsa justiziaren alde eta ondasunak zuzentasunez bana daitezen. Aita Santuak idatzi berri duen “Laudato si” entziklikari jarraituz... hau ere ez al da guztion etxea den mundua zaintzea? Aberats eta pobreak dauden munduan ezinezkoa da guztiei “jaten ematea”, horretarako borondatea agertu eta ahalegina egiten ez bada.

«Eman zuek jaten» enkarguaren oinarria ez da Jainkoaren indarra bakarrik, gizakien elkarlana eta eskuzabala ere bai. Eliseoren eta Jesusen kasuan bezala, badira aurreratzen diren pertsonak. Batek

hogei ogi eskaintzen ditu eta Jainkoak osatzen du lana. Ebanjelioko gazteak bost ogi eta bi arrain ditu eta Kristoren bedeinkapenak egiten du miraria. Jainkoak, alegia, giza eskuzabaltasuna bedeinkatzen du. Gure ekarpenetik abiatuta egiten du ugaritzearen miraria.

Gaur ere asko dira “ogitugaltze” onetan parte hartzen dutenak: kristau konprometituek, misiolariak, boluntarioak, hezkuntzan eta osasun munduan buru-belarri lan egiten duten erlijioso eta erlijiosak... “bere ogia” ez dutenekin partekatzen duten guztiak. Batzuk diruz laguntzen dute, besteek denbora eskaintzen dute, beste batzuk bere burua, bizi osoa. Batzuk hirugarren munduan, besteak gertuago, bere giroan, etxe ondoko parrokan. Toki askotan da beharrezkoa daukanetik ematen duen jendea.

Jainkoak hazarazten du guk ekarritakoa eta fruitu emanarazten dio, gutxi iruditu arren. Zer ondo, azken egunean Jesusek esango baligu: «jaten eman zenidaten... edaten eman zenidaten... nirekin egin zenuten».

### *Ogi materialetik, espirituzko ogira*

Ogia elkarbanatzea, beste “ogitugaltze” batzuk elkarbanatzearen irudi da, eta horien gose ere bada gizadia: kultura (zenbat jende eskolarik gabe!), lana (duintasunez eta egonkortasunez), etxebizitza (oinarrizko eskubide bezala), bizitzeko baliabideak (bere herria utzi behar izan duten etorkinenak bereziki).

Baina ebanjelio osoan zehar ikusten da, Jesusek espiritua asetzen duen ogia ere nahi duela eman, ogi materialaz gainera. Horregatik sendatzen ditu eta pizten... baina bereziki Erreina hots egiten die, bekatuak barkatzen eta Jainkoaganako bidea erakusten. Fedezko bidea egin dezagun nahi du, zalantzarik gabe.

### *Espirituzko batasunean*

Gaur ere, ekarriko ditugu ogia eta ardoa mahaira, hori izango da gure “ekarpenaren” irudia, geure buruak eskaintzearena, eta era harrigarrian Kristoren Gorputz eta Odol izango dira, gure kristau biderako janari.

Horrexek lagunduko digu san Pauloren deiari erantzuten: «Saia zaitzte Espirituaren batasunari eusten, bakearen lokarritz». Gure Elizak eta gure elkarteek izan dezatela batasun hori: elkarren ulermenean, aukerak ematean, eskua luzatzean... hitz batean bakearen lokarrian oinarri izango duen batasun hori.

### **Jainkoaren herriaren otoitza**

Senideok, eska dezagun Espiritu Santuaren indarra, Berak lagun diezagun munduko beharren alde otoitz egiten:

—Eska diezaiogun errukizko Jainkoari, Kristo ezagutzen hasi eta bataioko grazia hartu nahi dutenen alde, beraien haurrak bataiatzeko prestatzen direnen gurasoen alde. Eska diezaiogun Jaunari.

—Eska diezaiogun Jaunari gure herriaren alde eta bertan bizi garen guztion alde, baita munduko herri eta nazio guztien alde ere, bakea eta bizimodu hobea izan ditzagun. Eska diezaiogun Jaunari.

—Eska diezaiogun Jaunari mundu zabalean pertsegituak diren kristauen alde eta beraien pertsegitzaileen alde, izan dezatela begirunearen bihotz-berria. Eska diezaiogun Jaunari.

—Eska diezaiogun Jaunari hemen bilduak gaudenon alde eta otoitzean gogoan ditugun guztien alde, fedean gorde gaitzan eta bere Semearen erreinuan bildu. Eska diezaiogun Jaunari.

Jauna, Jainko ahalguztiduna, igandero biltzen gaituzu zerutik jaitsitako ogi bizia hartzera, entzun gure otoitzak, eta lagun iezaguzu eguneroko ogia ere elkarbanatzen. Jesu Kristo gure Jaunaren bitartez.

**Jaunartze-ondorengo otoitza**

**Zeruko sakramentua hartu dugu, Jauna,  
zure Semearen nekaldiaren betiko oroigarri:  
Berak bere maitasun neurrigabea eman digun dohain hori  
izan dakigula salbamenerako.  
Jesu Kristo gure Jaunaren bitartez.**